



Uhapšeni su privedeni u prostorije SIPA

Praznik u BiH: Privedena 22 dilera

U akciji Praznik izvedenoj u Sarajevu, Istočnom Sarajevu, ZHK-u i HNK-u uhapšene 22 osobe

Dvadeset dvije osobe uhapšene su jučer u akciji kodnog naziva Praznik koja je izvedena na području Sarajeva, Istočnog Sarajeva, Zapadnohercegovačkog i Hercegovačko-neretvanskog kantona zbog posjedovanja, proizvodnje i preprodaje droge, potvrđeno je iz Tužilaštva Kantona Sarajevo.

Iz MUP-a KS-a saopšteno je da su prilikom pretresa pronađeni i oduzeti veća količina droge, opreme za proizvodnju i preprodaju droge, mobiteli, računarska oprema, novac, vatreno oružje, municija, eksplozivne naprave, dokumentacija i jedno vozilo. Organi istrage rade na pronalasku još deset osumnjičenih koji su članovi iste grupe.

U ovoj akciji pretresi stambenih, poslovnih i pomoćnih objekata su obavljani na 34 lokacije.

Privedene osobe osumnjičene su da su u proteklom periodu počinile više krivičnih djela - organizovani kriminal, proizvodnja i stavljanje u promet, posjedovanje i omogućavanje uživanja droge. Za krivično djelo organizovanog kriminala najmanja kazna je godinu. Najmanja kazna za onog ko organizuje ili bilo kako rukovodi zločinačkom organizacijom je 10 godina zatvora.

U ovoj akciji učestvovalo je više od 300 policajaca. Postupajući tužilac će nakon saslušanja svih uhapšenih odlučiti o statusu osoba lišenih slobode u akciji Praznik. D. P.